

ASO LUA, 17 ME 2022

Na nofoia e le Fofoga Fetalai le Nofoa i le itula e 9:38 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

TUSI FAAMAONIA O LE FILIFILIA

E tusa ai ma aiaiga o le Fuaiupu 84(2) o le Tulafono o Faiga Palota 2019, **O Au, TUIMALEALIIFANO VAALETOA SUALAUVI II**, O Le Ao o le Malo, ua tuuina atu ai nei le Tusi Faamaonia o le Filifilia o le taua lona suafa iinei e avea ma Sui Usufono o le Malo Tutoatasi o Samoa, e amata mai le Aso Gafua 29 Novema 2021, ma suia ai le Tusi Faamaonia na sainia i le aso lava lea:

1. ALIIMALEMANU MOTI MOMOEMAUSU Alofa Tuuau
2. FAAGASEALII Sapoia Feagiai.

TUUINA ATU i lou nei Lima i Vailele i lenei aso 30 Novema 2021.

Sainia: Tuimalealiifano Vaaletoa Sualauvi II
O LE AO O LE MALO

Ina ia tusa ai ma aiaiga o le Fuaiupu 84(2)(b) o le Tulafono o Faiga Palota 2019, **O Au, TUIMALEALIIFANO VAALETOA SUALAUVI II**, O Le Ao o le Malo, ua tuuina atu ai nei le Tusi Faamaonia o le Filifilia o le Sui Tauva lenei e avea ma Sui Usufono Faaopoopo o le Fono Aoao Faitulafono o le Malo Tutoatasi o Samoa e tusa ai ma le Vaega 44(1A)(b) ma le 44(1E), ma e amata faamamaluina mai i le Aso Lulu, 11 o Me 2022:

TOOMATA Nora Leota.

TUUINA ATU i lou nei Lima i Vaialele i lenei aso 12 o Me 2022.

Sainia: Tuimalealiifano Vaaletoa Sualauvi II
O LE AO O LE MALO

FAATAUTOINA O SUI USUFONO FOU O LE PALEMENE

FOFOGA FETALAI: A o le i afifio mai sui usufono fou o le Palemene i luma o le Laulau mo le Tautoga, ou te valaau atu ina ia outou tutulai a o o’u faitauina le Tulafono Laitiiti o Amio Taualoa Faa-Palemene. Tutulai mai a outou Afioga.

Na tutulai sui usufono o le Palemene a o faitauina e le Fofoga Fetalai Tulafono Laitiiti o Amio Taualoa Faa-Palemene.

Tulafono Laitiiti o Amio Taualoa Faa-Palemene:

FAAMATALAGA O FAAMOEMOEGA:

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga taualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae. O aiaiga autu ua taua ua faamoemoe e tuuina atu ai ni taiala ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

O AIAIGA AUTU:

(1) **Faamaoni i le atunuu ma ona tagata:**

O sui usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa; ana faalapotopotoga ma ona tagata.

(2) **Faaaloalo i Tulafono:**

E tatau i sui usufono uma ona tausisia tulafono a Samoa ma puipuia aiaiga autu o lo o i totonu o le Faavae.

(3) **Faaaloalo i Tagata uma:**

E tatau i sui usufono uma ona faaaloalo i isi sui usufono, tagata lautele ma ofisa maotofi o le Malo faapea foi ma le galue i tulaga mamalu, faamaoni, o le le faaituau; aemaise le faia o le amiotonu i taimi uma.

(4) Faatinoga Lelei o Pule:

E tatau i sui usufono uma ona:

(a) faatulaga a latou mataupu totino;

(b) faaaoga so o se faamatalaga ma faamatalaga uma na maua mai i o latou tofi faale-Malo; ma

(c) faatinoina o so o se malosi po o pule na maua mai i o latou Tofi faale-Malo, mo na o le lelei o tagata lautele ma pe a fai e tulai mai o so o se tulaga talafeagai ma se tulaga moni e feteenai ai aia, pei o tulaga tau tupe a le sui usufono lava ia, tupe faaetulafono po o se aia a le sui usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le le auai atu i lena feutagaiga tau pisinisi.

Manaoga Faapitoa mo Minisita ma Isi Tagata o lo o Umia Tofi faale-Malo:

O sui usufono uma o lo o umia tofi faa-palemene o so o se ituaiga ua manaomia e usitaia atoatoa aloaia aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu o se malosi o so o se ituaiga, po o le a lava, e tusa ai i se mataupu o le a maua ai e sui usufono so o se faaopoopoga i ana meatotino po o se faamanuiaga.

FAASALAGA:

O le solia o lenei Tulafono Laitiiti o le a ono tagofia e le Komiti o Tulaga Aloaia ma Amio Tualoa po o e pei ona o le a fuafuaina e le Palemene.

TAUTOGA O LE LOTO FAAMAONI

FOFOGA FETALAI: Ou te valaau atu i Sui Usufono fou e toatolu o lo o totoe, ina ia afifio mai i le Laulau mo le faatinoina o la outou Tautoga:-

Ia faitau le Tautoga ma ta'u lou Suafa.

“O A’U O..... ou te tauto i le Atua e ona le malosi uma lava o le a ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a ou faataunuuina ma le tatau ai ma le faamaoni ou tiute e avea ai o se Sui Usufono o le Palemene o Samoa. Ia fesoasoani mai le Atua ia te Au.

Na faaalua le agaga fiafia o le Maota i le patipati o latou aao i le maea ai o le faatautoina o sui usufono fou.

FOFOGA FETALAI: Malo faafetai, o lea ua mautu lea vaega taua o le tatou Palemene i lenei taeao, o outou mama na.

Tulai mai lau Afioga i le Tamaitai Palemia.

SAUNOAGA FAAFEILOAI A LE PALEMIA

Afioga Hon FIAME NAOMI MATAAFA (Palemia): Faafetai i lau Afioga i le Fofoga Fetalai mo le avanoa. E tulaga ese foi lenei taeao. Ma e faatalofa atu i le mamalu o le Maota i lau Afioga i le Fofoga Fetalai, faapea sui usufono mamalu, tainane le tapuaiga a aiga, o uo ma aumeamamae a sui usufono Tamaitai ua faatautoina i lenei taeao. Ua tatou faatasi foi ma le vaega o le afaigaluega a le Malo o lo o faapea ona lagolago i le galuega a le Palemene.

Lau Afioga i le Fofoga Fetalai, sa ou manatu e fia fai sina upu ona e tulaga ese foi lenei taeao i le faatautoina o Afioga i Tamaitai sui usufono, Afioga ia Aliimalemanu, Afioga ia Faagasealii, faapea le Susuga ia Toomata. E ao lava ona faaoo atu se upu e fai ai au ma sui o le Maota i le afio o lau Afioga i le Fofoga Fetalai, tainane le nofo a tofi i itumalo o sui usufono filifilia. Tatou te tofua lagona le agaga faafetai ona ua tau lau o le faamoemoe, e faaatoa ma faamalieina le Tulafono e tusa ma sui usufono filifilia mo le Maota o Samoa, aemaise le vaega o lo o tautalagia le faamautuina o sui usufono Tamaitai i totonu o le Maota. O lea tatou te iloa e le i faigofie le tauasa mai o nei sui usufono, ma ua avea foi lea vaega o le Tulafono ua lagalaga ai upufai o le atunuu, ia, ma faaalua foi manatu o vaega eseese. Ae peitai, o le agaga lava ia o le Tulafono, ina ia faamautinoa le leo o lea ituvai o le atunuu i totonu o upufai. Ma ou te momoli atu ai le faamalalo i a outou Afioga i Tamaitai sui usufono filifilia, malo le tauatai, malo foi le onosai. O lea ua tuta lo outou sa, afifio maia, tala mai aao tatou galulue faatasi aua se manuia o le tatou atunuu.

Lau Afioga i le Fofoga Fetalai, o le tulai mai o Tamaitai nei, o le Afioga ia Aliimalemanu e le fou i le Maota, sa tulai mai o ia i le Nofoaiga talu ai ma sa ia tauaveina foi se tasi o tofi taua i totonu o le Palemene, o le avea lea ma Taitaifono o le Komiti o Tupe. O le afifio mai o Faagasealii ma le Susuga ia Toomata, ia, e fou i le tatou Maota, ae maualuga le faamoemoe, o le a faaopoopoina le loloto ma le taua o le fai-tofa ma le fai-uta a lenei Maota, e tauala i le sao mai o tatou uso ua faaopoopoo mai i lenei taeao.

Lau Afioga i le Fofoga Fetalai, o le lona lua ai lenei o Nofoaiga ua faaoga ai vaega o le Tulafono e faamautinoa ai le i ai o sui usufono Tamaitai i totonu o le Maota lenei.

I le Nofoaiga po o le Paeaiga 16 na tulai mai ai le sui usufono Tamaitai e toatasi le Afioga ia Faaulusau. O lenei Nofoaiga, o lea ua pale mai le toatolu, ae e i ai lona tulaga ese i le Nofoaiga lenei i aiaiga mo le Tulafono o sui usufono Tamaitai. Ua tatou masani ma iloa le aiaiga mo le faamautinoa o le 10%. Ae i le Nofoaiga lenei, lea ua tauala mai i le filifiliga o le Susuga ia Toomata, ua faaogaina ai le isi vaega o le Tulafono ina ua avanoa le Nofoa o le itumalo o Falealupo, o lea sa tauaveina e le Afioga ia Leota Tima Levai. O le aiaiga i totonu o le Tulafono, a faapea ua le mafai ona toe suitulaga se tamaitai i se Nofoa, ona faapea lea ona faaopoopoina le sui usufono Tamaitai. O lea la ua faatino lea vaega o le Tulafono i le Paeaiga lenei lau Afioga i le Fofoga Fetalai ma le mamalu o le Palemene.

Ia, o le taua o lenei taeao, ua atoa ma faamalieina Nofoa o le tatou Maota. Tatou sagai ane ia, ua tuta mai le sa o Tamaitai o le atunuu, tatou alo atu ia i le tatou galuega. Ia manuia lo outou tofi, ia outou maua le agaga o le fiafia i lo outou valaauina. Soifua ma ia manuia.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai e faanoinei atu pe maua so matou avanoa o lea ua taoto le saunoaga...

FOFOGA FETALAI: Ia tulai maia le saunoaga a lau Afioga i le Sui Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO: Na o se matou upu puupuu e fonofaapipii i le saunoaga matagofie ua opea i le Maota, le saunoaga a le Afioga i le Palemia aua foi lenei taeao, ona o se taeao ese foi lenei i le malae i Tiafau ma le Maota o le atunuu. Ae ou te manatu lau Afioga i le Fofoga Fetalai, o lea ua maea ona e momoli lapalapaomalo, ua maea foi ona e molitai le puapua i fatulegae ma malotumau e pei o le fetalaiga i le motu o Salaia. Aua o le upu moni lava, e toulu fuga o laau, e mou nanamu, e taape foi fatuoaki, ioe, aua e folau le soifuaga lenei o lo o outou soifua ma ou ola ai. Ae peitai, o le alofa ma le agalelei o le Atua i lenei taeao, ia lea ua tatou lelepa ai i malae o le totoa, malae o le manino.

Ona manatu lea, o le a faatini ia o tausala upu o le ola i le itupa gafua, o le latou lena matafaioi tausii, ae i ai foi le lagona o maota faitauina ma tupua iloga o le atunuu i ona faalupelupe ma ona faalagilagi, ia e manatu lava lea o lea ua uma ona faataoto e lau Afioga i le Fofoga Fetalai, a o se ala ua oo. Ona manatu lea, o le a le toe afea i sa matou gagana, ae matou te faatulou i

le paia foi faa-faigamalo i le Maota lenei, o lea ua tauaofia le tatou Maota, ia ua atoa foi pou o lauga i lenei taeao.

Ia ona faapea lea o se matou manatu, o le a faataalolo ia paia faaifogata ma paia apoapogata o Samoa i ona tulaga faalupe eseese, ae momoli atu le faafetai i saunoaga matagofie, a o se upu faamanuia a le Afioga i le Palemia. Ona manatu lea, o lele ua taliga e fialogo mauga o Matautia i lenei taeao, malo faafetai. Ioe. O lea foi ua tu le la ua fano le la o le vaatele sa folau i le loloa o le vasa, ua sii foi i uta ua tau i lona papa tuloto, ia a o se lupe foi o le vateatea sa olomalie, a lea ua le tu palapala, le tu eleele, a ua tu lima tu i le tula, tu naa le alofa o le Atua i lenei taeao.

Ona matou faapea lea, ia alofagia e le Atua, ia faamanuia le Atua i lo outou tulai mai Afioga i Tamaitai sui usufono fou o le Maota, ia maua sa outou lauga, maua so outou finagalo. O lena ua saunoa le Palemia, e taua lo outou sao, a o se finagalo faa-Tamaitai e faaleo ai lo outou finagalo i totonu o le Maota ma upufai o le Malo, e faufau ai le tatou afa, faufau ai le tatou sa ma afaafa ai so tatou sa, aua le folauga a Samoa, aua se manuia auiluma o le atunuu. O le matou tala, ia faapena ona agalelei le Atua. E le mafai ona tuuaititia le taua o tina ma tamaitai, o lo outou faalupega, o outou o tamasa, o outou o le feagaiga. A oo foi i taimi e louloua ai le tatou folauga ma siisii, ia o outou lava o le pae ma le auli. Ioe. Le faafofogaaga a Samoa i lenei taeao, ia o lea ua molimauiina, e ese foi lenei taeao ma le tulaga ua i ai, ia tatou ave lea i uta.

O tulaga uma pei ona taoto mai ai le Faamasinoga, ia tatou fai lea mo tatou i lenei taeao. E tele taimi o tauasa mai, faamalo le finau. E i ai lava le talitonuga ma le lagona, sa le finau lava outou mo outou, ae finau mo tamaitai uma o le atunuu. O lea la ua aumai faaaliali e le Atua i lenei taeao pei ona saunoa le Afioga i le Fofoga Fetalai, o le taeao lenei o lea ua faaaliali e le Atua le tulaga ua i ai. Viia le Atua, viia le Atua, ia viia lava oe e le nuu.

O le matou faamatalaga, agalelei le Atua i lenei aso, maua le tofa a lau Afioga i le Fofoga Fetalai, maua foi le tofa e le Afioga i le Palemia ma le la Itu, le Aiga Kapeneta, ia faapena foi lenei Itu o le Maota. Matou malolo atu i le alofa o le Atua.

FOFOGA FETALAI: Ua faamalo malele, malo foi tanoa i lau Afioga i le Palemia, lau Afioga i le Taitai o le Malo, o le Taitai foi lea o le Maota. O lea foi ua talifuaitau le Afioga i le Sui Taitai o le Itu Agai. Ia, ou te talitonu o lea ua fetau fola i lenei taeao, ua avatu foi faamanuiaga a le Maota o le Palemene, le Malo ma le Maota atoa o le Palemene i a outou Afioga, ia o le faamanuiaga foi lena a le Nofoa. O outou mama na, sagai ane aua outou tiute ma tofiga, tatou faamoemoe i le Atua mea uma, o lea ua faamanuia atu le tatou Palemene. Ia o tulaga aloaia lena o le tatou sauniga e pei ona tatou i ai i lenei taeao.

Ia, ae o le a avatu se upu faafeiloai a le Nofoa ona faaauau ai foi lea o galuega a le Maota. Ia, o le a tapaau pea ia i le matagi le fasa a le tapaau nai le siuvasa, aua o lea ua folau malama le ata nafoa o le taeao. Ua nanati a paesina foi le aau mamao i le soogataiula, ina ua sola le nuu tutai ae laga mauga talimalama o le taeao. E i ai foi le manatu, e le toe tau aamia le vaifolau, o lea ua paleleupea le alafa e pei o le upu i le ugauga a po ma le ugauga a sa. Ua pale foi i galutuu le seegapapa a le tupu, e pei o le fetalaiga i le malae o Tiamalosi.

E tatou te i ai faatasi i le agaga o le faafetai i le Atua e pei ona tatou faamua ai le faaneetaga i Lona mamalu i le taimi ua sola, ina ua Ia tatala faamanuiaga o le lagi i lenei taeao, ua mafai ai ona tatou fesilafai le tatou Maota i Lona agalelei ma le olioli ua Ia aumai. Faafetai ua Ia tuuloa puapuaga ma faigata o le ola nei, ua ia faataumamao foi tiga ma mafatiaga ogaoga o le ola nei mai ia te i tatou, ina ua maleifua mai i le lagi e mama ma le soifua manuia le paia o le Palemene i lenei taeao fou. Ia foi pea ia le viiga ma tumau atu ia te Ia, aua ua na o Ia e ou le viiga ma le mamalu uma lava.

Ou te ofo alofa atu ma faatalofa atu i le paia o le Palemene i lenei taeao i le afio o lau Afioga i le Taitai o le Malo lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kapeneta, faapea foi a outou Afioga i Minisita Lagolago.

Afio lau Afioga i le Sui Taitai o le Itu Agai, aemaise sui usufono mamalu uma o le Palemene. Malo le soifua ma le lagi e mama.

E faatalofa atu foi i le paia maualuga o le tatou atunuu ua mafai ona tatou faatasi i le Maota Fono o le Palemene i lenei taeao. E le taumate, o le paia i aiga, uo ma aumeamamae o Afioga i sui usufono sa faatauto i lenei taeao. Le paia faalagia o itumalo e fia, o paia e le toe tapueina, o le pa ati e le solo i se gagana a o mamalu foi e tumau e oo i le faavavau.

E faatalofa atu lau Palemene i lenei taeao, faamalo folau i lo outou soifua manuia ma le lagi e mama. Le paia o Ofisa Sili o Pulega o Matagaluega ma Faalapotopotoga Tumaoti a le Malo ua tatou mafuta i lenei taeao, malo le soifua manuia.

E faatalofa atu foi i le tapuaiga a lau Afioga i Le Ao Mamalu o Le Malo ma lau Masiofo, le Sui o le Fono a Sui Tofia ma lou faletua, le Faamasino Sili ma le mamalu o le Faamasinoga, ua faamalo le soifua manuia i lenei taeao fou.

Samoa i lau tapuaiga e afua mai i tumutumu mauga faitauina seia paia se aupito itiiti, o ou mamalu e leai se vave na te toe toese i le paia i Aiga ma Tama, Tama ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Le tapuaiga mana a le aufaigaluega faauuina o le Talalelei, matou te ofo alofa ma faatalofa atu i lenei taeao, ua faamalo le soifua manuia i lo outou lagi e mama.

Ia, tau lava foi ina afea i se gagana a le Nofoa le faamoemoe o lenei taeao, o lea ua saunua le Taitai o le Malo ma le Sui Taitai o le Itu Agai sa tomua i lenei taeao aua le faatautoina o sui usufono. E i ai le talitonuga o le Nofoa, o se taeao na saunia e le Atua lenei taeao. E eseese lava o tatou talitonuga ma fuafuaga ma polokalame a le Atua i lo outou soifua ma so matou ola. Ou te manatu foi, sa i ai le matega i le faagasologa o lenei mataupu, peitai, na o le Atua o lo o i ai le atoatoa ma le amiotonu, ua na o Ia foi tatou te saili i ai le tali, ua mafua ai lenei taeao.

O le agaga lava ia o le Fofoga Fetalai, ia o tatou saili i le loloto figota o le moanauti, o lea ua tali faaaliali le Atua ia faia lea mo i tatou. Faamalo le onosai ma le faapalepale. O upu lava o ana Afioga Paia, “O e faatali mo le Alii e faafouina i latou, e faaloloa o latou apaau pei o aeto, e taufetuli e le vaivai, e savavali e saogalemu, aua e laveai mai pea lava i ai le Alii.” O upu foi e masani ai i tatou, ua talia le faaolataga a le Atua. A faatu oe e le tagata, e te toe pau, ae a faatu oe e le Atua, e le mafai e se tagata ona faatoilaloina oe.

O le mea lea, a outou Afioga i sui usufono sa faatauto i lenei taeao, ia sagai ane ai o le tai, faaaupegaina mai le lagi la outou tofa aua le tatou tautua faaauau mo Samoa o lo o tapuai mai, ae ia sili ai mo se viiga o lo tatou Atua. Ia manuia tele lenei taeao ma lo outou valaauina.

ISI FAASILASILAGA A LE FOFOGA FETALAI

Mo le silafia o le Palemene, ua ou taulimaina nei se faitioga tusinga e faatatau i le lagaina o se mataupu tau tulaga aloaia e pei ona aiaia i Tulafono Tumau 178(1). O lea faitioga tusinga e tauala mai i se tasi o sui usufono o lenei Maota, e faasaga i se isi sui usufono o le Palemene.

E tusa ai ma aiaiga o le Tulafono Tumau 180(1), ua maea ona tuuina atu e le e ana lenei mataupu le kopi o lenei faitioga i le sui usufono o lo o faasaga i ai mo lona silafia manino o le mataupu. I le usitaia o aiaiga o Tulafono Tumau 180(2), ua ou lipotiina mai ai ma faailoaina atu mo le silafia e le Maota, ina ua maea ona uluai faailoa atu e le e ana le faitioga i le sui usufono o lo o faasaga i ai le faitioga.

E tusa ai ma tulaga aloaia o tofiga faa-sui usufono mamalu o le Maota, o le a le mafai ona ou faailoaina atu i lenei taeao suafa o sui usufono o aafia i lenei mataupu, ona o se mataupu e le o i se tulaga ua faamaonia.

E tusa ai ma Tulafono Tumau 178(2), o le a iloiloaina e le Fofoga Fetalai le tulaga o le faitioga po o lenei mataupu mo sana faaiuga, po ua aafia ai tulaga aloaia o le Palemene, i le mataupu ua tuuina mai. Ona o lea, ou te faatonuina ai le sui usufono mamalu o lo o faasaga i ai lenei faitioga, ina ia tuuina mai se tali tusinga i le faitioga ua ia taulimaina, ia le silia le itula e 4 i le afiafi o le aso Lua, 24 Me 2022 mo le iloiloa a le Fofoga Fetalai. O le a faasilasila

aloaia i luma o le Palemene le faaiuga a le Fofoga Fetalai i lenei mataupu i lana Fonotaga o le aso 31 Me 2022.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5)

1. P.P.2022/2023 Nu.3, Lipoti a le Komiti o le Vaega Tau le Tamaoaiga i le P.P. 2020/2021 Nu.64, Lipoti Faale-Tausaga a le Matagaluega o Pisinisi, Alamanuia ma Leipa mo le Tausaga Faaletupe 2019/2020.
2. P.P.2022/2023 Nu 4, Lipoti a le Komiti o le Vaega Tau le Tamaoaiga i le S.R. 2021/6, Faasilasilaga o le Amata Faamamaluina o le Tulafono e Fuafua Tatau ai le Ava Malosi 2020.

FOFOGA FETALAI: A o le i faaauauina galuega a le Palemene, o lea ua matau atu e le Nofoa o lea ua nofoi mai le Nofoa o le sui usufono mamalu mai Vaimauga 1 sa fai i ai le finagalo o le Palemene. E manatu foi le Nofoa, a o le i amatalia le tatou galuega ou te tapa lau Afioga i le sui usufono mamalu mo sau faatoesega i le Maota ma le atunuu.

Afioga SULAMANAIA FETAIAI TAUILIILI TUIVASA (Vaimauga 1): Ou te tulai ma le faaaloalo e faaopoopo foi i le faafetai na saunia e lau Afioga i le Fofoga Fetalai i lenei taeao. Ua sau foi i lenei taeao, ua ese foi lagona i le alafai mai o le atunuu ma faatauto foi nisi sui usufono mamalu o lenei Palemene e ala i le ituvai o tina, ia viia le Atua.

A o lenei itula e avatu se faamaualaloga a lenei itumalo e ala i lenei sui usufono. E faamalulu atu o le a foi se silasila i se amioga ma se aga ua le tau tamalii i le silasila foi a lenei Palemene e ala i lau Afioga i le Fofoga Fetalai, le Afioga i le Tamaitai Palemia ma lena Itu, ma lenei foi Vaega, ia malu ave i fale i outou finagalo. O lenei taeao ma le alafai mai i fanuga lelei, ua tuanai foi ma goto le la, aua ne i ita pea. A o le lagona o lenei sui usufono, ia faamalulu atu, e faapena foi le tapuaiga a si ou itumalo. O le agaga lava ia i le tulaga ia faapena ona mamalu lenei Palemene, ae ua aveia foi ma mea ua i ai se tulaga ua lape foi lenei itumalo ma lenei sau usufono. Ia avatu malu i puega i lau Afioga i le Fofoga Fetalai. E ava tele le sui usufono lenei. O le a foi se amioga se tu ma se aga ua le tau i se silasila ma ua le tautamalii i lena Itu e pei ona faatu ai le lafo, ia faatea mea i nuu le aina, ae alo i luma so tatou ai. E pei foi o lenei taeao fou, ua aumai foi le tali faaaliali a le Atua, o lea ua tali mai i sui usufono tamaitai. O lea la faatoa atoa le Palemene a Samoa. O lea ua omai sui tamaitai, viia ai le Atua.

O le tala lena i lenei taeao, lau Afioga i le Fofoga Fetalai, aemaise lau Afioga i le Palemia ma le Kapeneta ma le paia o lenei Palemene. Ia toe foi

mai i le sui usufono se amioga foi ma se aga ua le tautamalii i la outou silasila i le Fonotaga ua tuanai. Ma le agaga faaaloalo i lau Afioga a le Fofoga Fetalai.

FOFOGA FETALAI: Ua faamalo faafetai saunoa i lau Afioga i le sui usufono mamalu mai Vaimauga 1. O le taua foi lena o lenei taeao, o lea ua e saunoa ma ua e faamaualalo mai foi i le Palemene, aemaise o le faafofogaaga a le atunuu, malo faafetai. O oe o se tasi o sui usufono matua o le tatou Palemene, e faamoemoe atu, o tulaga aloaia o le tatou Palemene e faamoemoe i a outou afioga, tou te lagolago mai foi i le Nofoa aua le tauaveina o le galuega. O le mea lea faafetai, o lea foi ua faafofoga atu ma le totoa le paia o le Maota aemaise o le faafogafoga mai o le atunuu aemaise o le itumalo. Ia faafetai o lea ua e lagonaina le taua o le tatou galulue faatasi ma tausoa faatasi la tatou avega, aua le manuia o si o tatou atunuu, aemaise lava o le tatou valaauina e tusa o tofiga a le Atua e tauala mai i o tatou itumalo.

O le mea lea faafetai, ia fai ma aoaoga nei mea mo le agai i luma, aemaise foi o sui usufono mamalu o le Palemene, e faamoemoe atu i la outou tofa. Ia faapena ona maua pea le toafilemu ma toa pea le tai, aua lava le fono mamalu a le atunuu ua tofia ai i tatou. O le mea lea, malo faafetai ua faafofoga le Palemene, ou te talitonu o lea foi ua magalo le sui usufono mamalu e tusa foi o le tulaga sa i ai.

O le mea lea, ia sagai ane ai o le tai, ia faafouina lou soifua galue ma lou soifua auuana, ia faafouina i lenei taeao. Ia faapena ona faagasolo ai pea le agai i luma o le tatou galuega.

LAFO A LE KOMITI O TULAGA ALOAIA MA AMIO TAUALOA

FOFOGA FETALAI: Ia tulai mai lau Afioga i le Taitaifono o le Komiti o Tulaga Aloaia ma Amio Taualoa, lau Afioga i le Minisita o le Soifua Maloloina.

Afioga Hon VALASI LUAPITOFANUA TOOGAMAGA TAFITO SELESELE (Taitaifono, Komiti o Tulaga Aloaia ma Amio Taualoa): E tumau le mamalu ma le paia o lenei Maota, o le Maota e faufau ai Tulafono a Samoa.

Ae ua ou tulai atu i le ava tele ma le faaaloalo lau Afioga i le Fofoga Fetalai, talu ai e le i maea lelei iloiloga a le Komiti o Tulaga Aloaia ma Amio Taualoa i le galuega na tuuina mai e lenei Fono Aoao Faitulafono, ou te tulai atu ai ma le faaaloalo e faatu le lafo e faapea,

1. *Ina ia tusa ai ma aiaiga o Tulafono Tumau 166(2) e talosagaina ai se faatagaga a le Fono Aoaofaitulafono mo se taimi faaopoopo e faaauau ai iloiloga a lenei Komiti.*
2. *E talu ai o le taua tele o le mataupu o lo o iloiloina e lenei Komiti, ia faataatiaese Tulafono Tumau 30(2), ma avanoa ai le toe tauaofia o le Palemene i le aso 24 Me 2022, e toe lipoti mai ai le Komiti o Tulaga Aloaia ma Amio Taualoa.*

O le lafo lea lau Afioga.

Faaluaina e le Sui Palemia ma le Minisita mo Faatoaga ma Faigafaiva.

Na faamaonia le lafo.

FOFOGA FETALAI: Ua tatou i ai i le siui o tatou taualumaga o galuega sa faatulaga mo lenei aso. E i ai foi le manatu, o se laolao lelei lea e faaleo atu ai pea se lagona o le Nofoa, aua o le tatou galuega e tausoa, tulou le gagana. O le aso Fono lenei, e le o aofia i le tatou kalena o polokalame o aso Fono a le Palemene. Ae peitai ona o le lafo na faamaonia e le tatou Maota na atofa ai le aso Fono lenei mo le toe lipoti mai ai e le Komiti o Tulaga Aloaia ma Amio Taualoa i le mataupu tau tulaga aloaia, e pei ona faatonuina ai e le Fono Aoaofaitulafono.

O lea na fofoga aloaia le tatou Maota i le lafo na tatalo mai ai le Taitaifono ma le Komiti, e silafia uma foi e lo outou mamalu le mafuaaga autu, o le lē maea o iloiloga a le Komiti. O lenei foi mataupu sa silafia uma lava e i latou o lo o aafia ai, le tuuina atu o lea mataupu i le Komiti ma le taimi ua faamaonia e le Palemene e toe lipoti mai ai. O le faanoanoaga o le Nofoa o le lē amanaia o le mamalu o le Palemene, seivagana o ni gasegase ma ni faalavelave e tutupu faafuasei, ona faalavelavea lea o le tatou auai i galuega fai a le Palemene. A o isi lava tuatuagia e tatau lava ona faamuamua lo tatou valaauina. Sa le tatau ona tulai mai lenei faafitauli aemaise e o lo o manaomia e le Komiti e pei ona i ai i luma o le Komiti. O lea ua toe tolopo galuega a le Palemene, e lagona ai lava le faanoanoa. Ae silafia lelei e le tatou Maota, ia tumau le mamalu o le Palemene. Ia alolofa sui usufono mamalu ia tautuana lo tatou valaauina, o lo o tatalo ma tapuai mai lo tatou atunuu mo lana Palemene. Ua na o se faamanatu mo le lelei faagasolo o le tatou galuega.

Ia ua faamalo le usufono i lenei taeao i le paia o le Palemene. Ia Samoa ma lau tapuaiga i ou tulaga faalupelupeina, faamalo faafetai. E manuia lava le alofaiva o lau Palemene ona o le mana o la outou tapuaiga. Ia faamagalose gagana ua sala a lau Palemene i lenei aso. Ia agalelei le Atua i si o tatou atunuu i fuafuaga o lenei aso.

Pe a tatala le filialii i le paia o le Maota, ia muaau ma muliau le Alii i le afifio atu. Mo le silafia, ua saunia e le tatou Ofisa le taumafataga o le taeao, tatou te talisua faatasi ai pe a tatou tolopo.

Ae tatou te le i tolopo, ou te talosaga atu i lau Afioga i le Minisita o le Soifua Maloloina, le Taitaifono o le Komiti Taualoa e te saunia se tatou tatalo.

Na tolopo Taulumaga a le Fono Aoaofaitulafono i le itula e 10:22 i le taeao seia aulia le itula e 9:30 i le taeao o le Aso Lua, 24 Me 2022.